

00385

欽定舊唐書

卷一百十五之一百二十四

欽定四庫全書

卷一百一十五

舊唐書卷一百十五

後晉司空中書門下平章事劉昫撰

列傳第六十五

崔器

趙國珍

崔瓘

敬括

韋元甫

魏少遊

衛伯玉

李承

崔器深州安平人也曾祖恭禮狀貌豐碩飲酒過斗貞觀中拜駙馬都尉尙神堯館陶公主父肅然平陰丞器有吏才性介而少通舉明經歷官清謹天寶六載爲萬年尉踰月拜監察御史中丞宋渾爲東畿採訪使引器爲判官渾坐賊流貶嶺南器亦隨貶十三年量移京兆府司錄轉都官員外郎出爲奉先令逆胡陷西京器沒於賊仍守奉先居無何屬賊黨同羅叛賊長安守將安守忠張通儒並亡匿又渭上義兵起一朝聚徒數萬器懼所受賊文牒符勅一時焚之榜召義師欲應渭上軍及渭上軍破賊將崔乾祐先鎮蒲同使麾下騎三十人捉器器遂北走靈武器素與呂諲善諲引爲御史中丞兼戶部侍郎從肅宗至鳳翔加禮儀使尅復二京爲三司使器草儀注駕入城令陷賊官立於含元殿前露頭跣足撫膺頓首請罪以刀杖環衛令扈從羣官宰臣已下視之及收東京令陳希烈已下數百人如西京之儀器性陰刻樂禍殘忍寡恩希旨奏陷賊官準律並合處死肅宗將從其議三司使梁國公李峴執奏固言不可乃六等

定罪多所原有唯陳希烈達奚珣斬於獨柳樹下後蕭華自相州賊中仕賊官歸闕奏云賊中仕官等重爲安慶緒所驅脅至相州初聞廣平王奉宣恩命釋放陳希烈已下皆相顧曰我等國家見待如此悔恨何及及聞崔器議刑太重衆心復搖肅宗曰朕幾爲崔器所誤呂諲驟薦器爲吏部侍郎御史大夫上元元年七月器病腳腫月餘疾亟瞑目則見達奚珣叩頭曰大尹不自由左右問之器答曰達奚大尹嘗訴寃於我我不之許如是三日而器卒

趙國珍牂牁之苗裔也天寶中以軍功累遷黔府都督兼本管經略等使時南蠻閣羅鳳叛宰臣楊國忠兼劍南節度遙制其務屢喪師徒中書舍人張漸薦國珍有武略習知南方地形國忠遂奏用之在五溪凡十餘年中原興師唯黔中封境無虞代宗踐祚特嘉之召拜工部尚書大厯三年九月以疾終贈太子太傅

崔瓘博陵人也以士行聞莅職清謹累遷至澧州刺史下車削去煩苛以安人爲務居一年風化大行流亡襁負而至增戶數萬有司以聞優詔特加五階至銀青光祿大夫以甄能政遷潭州刺史兼御史中丞充湖南都團練觀察處置使瓘到官政在簡肅恭守禮法將吏自經時艱久不奉法多不便之大厯五年四月會月給糧儲兵馬使臧玠爲判官達奚觀忿爭觀曰今幸無事玠曰有事何逃屬色而去是夜玠遂

搆亂犯州城以殺達奚觀爲名瓚惶遽走逢玠兵至遂遇害代宗聞其事悼惜久之

敬括河東人也少以文詞稱鄉舉進士又應制登科再遷右拾遺內供奉殿中侍御史天寶末宰臣楊國忠出不附己者括以例爲果州刺史累遷給事中兵部侍郎大理卿性深厚志尙簡淡在職不務求名因循而已大厯初叛臣周智光伏誅詔選循良爲近輔以括爲同州刺史歲餘入爲御史大夫遲重推誠於下未嘗以私害公士頗稱焉而從容養望不舉綱紀士亦以此少之大厯六年三月卒

韋元甫少修謹敏於學行初任滑州白馬尉以吏術知名本道採訪使韋涉深器之奏充支使與同幕判官員錫齊名元甫精於簡牘錫詳於訊覆涉推誠待之時謂員推韋狀元甫有器局所莅有聲累遷蘇州刺史浙江西道都團練觀察等使大厯初宰臣杜鴻漸首薦之徵爲尙書右丞會淮南節度使缺鴻漸又薦堪當重寄遂授揚州長史兼御史淮南節度觀察等使在揚州三年政尙不擾事亦粗理大厯六年八月以疾卒於位

魏少遊鉅鹿人也早以吏幹知名歷職至朔方水陸轉運副使肅宗幸靈武杜鴻漸等奉迎留少遊知留後備宮室掃除之事少遊以肅宗遠離宮闕初至邊藩故豐供具以悅之將至靈武少遊整騎卒千餘干戈耀日於靈武南界鳴沙縣奉迎備威儀振旅而入肅宗至靈武殿宇御幃皆象宮闈諸王公主各設本

院飲食進御窮其水陸肅宗曰我至此本欲成大事安用此爲命有司稍去之累遷衛尉卿乾元二年十月議率朝臣馬以助軍少遊與漢中郡王瑒沮其議上知之貶渠州長史後爲京兆尹請中書門下及兩省五品已上尙書省四品已上諸司正員三品已上諸王駙馬中其周已上親及女婿外甥不得在京兆府判官畿令赤縣丞簿尉勅從之遷刑部侍郎大厯二年四月出爲洪州刺史兼御史大夫充江南西道都團練觀察等使四年六月封趙國公賈明觀者本萬年縣捕賊少胥劉希暹恃魚朝恩之勢恣行兇忍毒甚對虺朝恩希暹既誅元載當權納明觀姦謀容之特令江西効力明觀未出城百姓萬衆聚於城外皆懷搏石候之期投擊以快意載聞之特令所由吏擁百姓入城內由是獲免在洪州二年少遊爲觀察使承元載意苟容之及路嗣恭代少遊到州卽日杖殺識者以是減魏之名多路之政大厯六年三月己未卒於官贈太師少遊居職緣飾成務有規檢善任人果於集事前後四領京尹雖無赫赫之名而讜讜廉謹有足稱者

衛伯玉有膂力幼習藝天寶中杖劍之安西以邊功累遷至員外諸衛將軍肅宗卽位興師靖難伯玉激憤思立功名自安西歸長安初爲神策軍兵馬使出鎮乾元二年十月逆賊史思明遣僞將李歸仁鐵騎三千來犯伯玉以數百騎於疆子坂擊破之積尸滿野虜馬六百匹歸仁與其黨東走以功遷右羽林軍

大將軍知軍事轉四鎮北庭行營節度使獻俘百餘人至闕下詔解縛而赦之遷伯玉神策軍節度上元二年二月史思明領衆西下圖長安史朝義率其黨夜襲陝州伯玉以兵逆擊大破賊於永寧賊退進位特進封河東郡公廣德元年冬吐蕃寇京師乘輿幸陝以伯玉有幹略可當重寄乃拜江陵尹兼御史大夫充荆南節度觀察等使尋加檢校工部尙書封城陽郡王大曆初丁母憂朝廷以王昂代其任伯玉潛諷將吏不受詔遂起復以本官爲荆南節度等使時譏醜之大厯十一年二月入覲以疾卒於京師

李承趙郡高邑人吏部侍郎至達之孫國子司業舍之第二子也承幼孤兄睦鞠養之旣長事兄以孝聞舉明經高第累至大理評事充河南採訪使郭納判官尹子奇圍汴州陷賊拘承送洛陽承在賊庭密疏姦謀多獲聞達兩京剋復例貶撫州臨川尉數月除德清令旬日拜監察御史淮南節度使崔圓請留充判官累遷檢校刑部員外郎兼侍御史圓卒歷撫州江州二刺史課績連最遷檢校考功郎中兼江州刺史徵拜吏部郎中尋爲淮南西道黜陟使奏於楚州置常豐堰以禦海潮屯田瘠鹵歲收十倍至今受其利時梁崇義縱恣僭慢朝廷將加討伐李希烈揣知之上表數崇義過惡請率先誅討上悅之每對朝臣多稱希烈忠誠承自黜陟廻因奏之曰希烈將兵討伐必有微勳但恐立功之後縱恣跋扈不稟朝憲必勞王師問罪上初未之信無幾希烈旣平崇義果有不順之跡上思承言故驟加擢用建中二年七月拜

同州刺史河中尹晉絳都防禦觀察使九月轉襄州刺史山南東道節度觀察鹽鐵等使希烈既破崇義擁兵襄州遂有其地朝廷慮不受命欲以禁兵送承承請單騎徑行既至希烈處承於外館迫脅萬應承恬然自安誓死王事希烈不能屈遂剽虜闔境所有而去襄漢爲之空承治之一年頗得完復初希烈雖歸蔡州留將校等於襄州守當時所掠得財帛什物等後使襄漢往來不絕承亦使腹心臧叔雅往來許蔡厚結希烈腹心周曾王玢姚憺等及曾等謀殺希烈以衆歸朝多承首建謀也累賜密詔褒美之承尋改檢校工部尙書兼潭州刺史湖南都團練觀察使建中四年七月卒於位年六十二贈吏部尙書承少有雅望至其從官頗以貞廉才術見稱於時

史臣曰自古酷吏濫刑幸免者多矣苟無強魂爲祟沮議者惑焉器深文樂禍居官令終非達奚訴寃無以顯其陰責矣國珍守黔溪瑾修禮法括推誠馭下元甫爲政寬簡少遊規檢集事皆可稱者伯玉破敵立功足爲猛士丁憂冒寵終是武夫承忠懇謀議勤勞盡瘁方之者鮮矣

贊曰崔器深文達奚作祟七子伊何李承爲最

舊唐書卷一百十六

後晉司空同中書門下平章事劉陶撰

列傳第六十六

肅宗代宗諸子 肅宗十三子 代宗二十子

越王係 承天皇帝倓 衛王佖 彭王儻 堯王儼 涇王僊 鄆王榮

襄王儼 杞王倓 召王偁 恭懿太子侶 定王侗 淮陽王儇 昭靖太子邈

均王遐 睦王述 丹王逾 恩王連 韓王迥 簡王遵 益王迺

隋王迅 荆王選 蜀王邈 忻王造 韶王邈 嘉王遵 端王遇

循王遵 恭王通 原王達 雅王逸

肅宗皇帝十四子章敬皇后生代宗皇帝宮人孫氏生越王係張氏生承天皇帝王氏生衛王佖陳婕妤生彭王儻韋妃生堯王儼張美人生涇王僊裴昭儀生襄王儼段婕妤生杞王倓崔妃生召王偁張皇后生恭懿太子侶定王侗宮人生鄆王榮宋王儇

越王係本名儼肅宗第二子也天寶中封南陽郡王授特進至德二年十二月進封趙王乾元二年三月  
乾隆四年校刊 舊唐書卷一百十六列傳

九節度之兵潰於河北史思明僭號於相州王師未集朝廷震駭詔以李光弼握兵關東以代子儀光弼請以親賢統師七月詔曰握兵之要古先爲重命帥之道心膺攸憑是知靖難夷兇必資於金革總戎授律實仗於親賢蓋將底寧邦家保息黎獻者矣朕以薄德纘承鴻緒往屬元兇暴亂中夏不寧上憑宗社之靈下藉熊羆之力由是廓清咸洛拯此生人頃以河朔殘妖尙稽天討蛇豕竊依於城堡塗炭久被於齊眈朕爲人父母寧忘閔念雖好生息戰每冀其歸降而餘孽昧恩靡聞于悔禍所以軒后親征於獯鬻周文致役於昆夷古之用兵蓋非獲已越王係幼稟異操夙懷韜略負東平之文學蘊任城之智勇性惟忠孝持愛敬以立身志尙權謀有經通之遠智知子者父方有屬於維城擇能而授俾克申於戎律且兇徒嘯聚頗歷歲時惡旣貫盈理當撲滅君親有命可不敬乎俾展龍豹之韜永清梟獍之類可充天下兵馬元帥仍令司空兼侍中薊國公光弼副知節度行營事應緣軍司署置所司準式九月史思明陷洛陽光弼以副元帥董兵守河陽王不出京師十月下詔車駕親征諫官論奏乃止王請行不許三年四月改封越王寶應元年四月肅宗寢疾彌留皇后張氏與中官李輔國有隙因皇太子監國謀誅輔國使人以肅宗命召太子入宮皇后謂太子曰賊臣輔國久典禁軍四方詔令皆出其口頃矯制命逼徙聖皇今聖體彌留心懷怏怏常忌吾與汝又聞射生內侍程元振結託黃門將圖不軌若不誅之禍在頃刻太子泣

而對曰此二人是陛下勳舊內臣今聖躬不康重以此事驚撓聖慮情所難任若決行此命當出外徐圖之后知太子難與共事乃召係謂之曰皇太子仁惠不足以圖平禍難復以除輔國謀告之曰汝能行此事乎係曰能后令內謁者監段恆俊與越王謀召中官有武勇者二百餘人授甲於長生殿是月乙丑皇后矯詔召太子程元振伺知之告輔國元振握兵於凌霄門候之太子既至以難告太子曰必無此事聖慮危篤吾豈懼死不赴召乎元振曰爲社稷計行則禍及矣遂以兵護太子匿於飛龍殿丙寅夜元振輔國勒兵於三殿前收捕越王及同謀內侍朱光輝段恆俊等百餘人禁繫幽皇后於別殿侍者十數人隨之是日皇后越王俱爲輔國所害係子建道逾建中元年十一月封武威郡王授殿中監同正員適封興道郡王授中監同正員逾封齊國公光祿卿同正員

承天皇帝倓肅宗第三子也天寶中封建靈郡王授太常卿同正員英毅有才略善射祿山之亂玄宗幸蜀倓兄弟典親兵扈從車駕渡渭百姓遮道乞留太子太子諭之曰至尊奔播吾不忍遠離左右俟吾見上奏聞倓於行宮謂太子曰逆胡犯順四海分崩不因人情何以興復夫有國家者大孝莫若存社稷今從至尊入蜀則散關已東非皇家所有何以維屬人情殿下宜購募豪傑暫往河西收拾戎馬點集防邊將卒不下十萬人光弼子儀全軍河朔謀爲興復計之上也廣平王亦贊成之於是令李輔國奏聞玄宗

忻然聽納乃分從官士卒以遣之時敗卒膽破兵仗不完太子既北上渡渭一日百戰倏自選驍騎數百衛從每蒼黃顛沛之際血戰在前太子或過時不得食倏涕泗不自勝上尤憐之軍士屬目歸於倏至靈武太子卽帝位廣平旣爲元子欲以倏爲天下兵馬元帥侍臣曰廣平王家嗣有君人之量上曰廣平地當儲貳何假更爲元帥左右曰廣平今未卽立艱難時人尤屬望於元帥況太子從曰撫軍守曰監國今之元帥撫軍也廣平爲宜遂以廣平爲元帥倏典親軍李輔國爲元帥府司馬時張良娣有寵倏性忠蹇因侍上屢言良娣頗自恣輔國連結內外欲傾動皇嗣自是日爲良娣輔國所構云建寧恨不得兵權頗齎異志肅宗怒賜倏死旣而省悟悔之明年冬廣平王收復兩京遣判官李泌入朝獻捷泌與上有東宮之舊從容語及建寧事肅宗改容謂泌曰倏於艱難時實得氣力無故爲下人之所間欲圖害其兄朕以社稷大計割愛而爲之所也泌對曰爾時臣在河西豈不知其故廣平兄弟天倫篤睦至今廣平言及建寧則嗚咽不已陛下之言出於讒口也帝因泣下曰事已及此無如之何泌因奏曰臣幼稚時念黃臺瓜辭陛下嘗聞其說乎高宗大帝有八子睿宗最幼天后所生三子目爲行第故睿宗第四長曰孝敬皇帝爲太子監國而仁明孝悌天后方圖臨朝乃鳩殺孝敬立雍王賢爲太子賢每日憂惕知必不保全與二弟同侍於父母之側無由敢言乃作黃臺瓜辭令樂工歌之冀天后聞之省悟卽生哀愍辭云種瓜黃臺

下瓜熟子離離一摘使瓜好再摘令瓜稀三摘猶尚可四摘抱蔓歸而太子賢終爲天后所逐死于黔中  
陛下有今日運祚已一摘矣慎無再摘上愕然曰公安得有是言時廣平王立大功亦爲張皇后所忌潛  
搆流言泌因事諷動之及代宗卽位深思建寧之冤追贈齊王大厯三年五月詔曰故齊王儉承天祚之  
慶保鴻名之光降志尊賢高才好學藝文博洽智略宏通斷必知來謀皆先事識無不達理至逾精乃者  
寇盜橫流鑾輿南幸先聖以宸辰之懸將待君親惟王以宗廟之重誓寧家國克協朕志載符天時立辨  
羣議之非同獻五原之計中興之盛實藉奇功景命不融早從厚歿天倫之愛震惕良深流涕追封胖于  
東海頃加表飾未極哀榮夫以叅舊邦再造之勤成天下一家之業而存未峻其等歿未尊其稱非所以  
旌徽烈明至公也朕以眇身繼膺大寶不及讓王之禮莫申太弟之嗣所懷靡殫邈想逾切非常之命寵  
錫攸宜敬用追諡曰承天皇帝與興信公主第十四女張氏冥婚諡曰恭順皇后有司準式擇日冊命改  
葬于順陵仍祔于奉天皇帝廟同殿異室焉

衛王佖肅宗第四子天寶中封西平郡王授殿中監同正員早薨寶應元年五月追贈衛王

彭王僅肅宗第五子天寶中封新城郡王授鴻臚卿同正員至德二年十二月進封彭王乾元二年冬史  
思明再陷河洛關東用兵人情震懼羣臣請以親王遙統兵柄三年四月詔曰古之哲王宅中御宇莫不

內封子弟外建藩維故周稱百代抑聞麟趾之美漢命大官亦樹犬牙之制歷考前載率由舊章朕以薄德纘承鴻緒屬豺狼未殄金革猶虞賴文武盡臣協心同德庶克清於玄祿期永保於皇圖且授鉞分符義已先於用武又維城作翰道方弘於建親咨爾分閭之崇成予磐石之固彭王僅等銀潢毓慶璫璫分輝忠孝稟於天成文武稱其備用今三秦之地萬國來庭誠宜列皇子以建封崇懿藩而制勝是資固本委以臨戎彭王僅可充河西節度大使兗王曄可充北庭節度大使涇王倓可充隴右節度大使杞王僅可充陝西節度大使興王侶可充鳳翔節度大使僅是歲薨子鎮授太僕卿同正員封常山郡王

兗王曄肅宗第六子母韋妃刑部尚書堅之妹肅宗在東宮選爲太子妃生曄及永和公主後爲李林甫誣構被誅太子懼奏請與妃離異於別宮安置開天寶中封潁川郡王授太子詹事同正員至德二年十二月進封兗王乾元三年領北庭節度大使寶應元年薨

涇王倓肅宗第七子天寶中封東陽郡王授光祿卿同正員至德二載十二月進封涇王乾元三年領隴右節度大使興元元年薨

鄆王榮肅宗第八子天寶中封靈昌郡王早世寶應元年五月追贈鄆王

襄王儼肅宗第九子至德二載十二月封襄王貞元七年正月薨

杞王倓肅宗第十子母段婕妤貞元六年六月贈爲昭儀至德二載封貞元十四年薨

召王僖肅宗第十一子至德二載十二月封元和元年薨

恭懿太子伾肅宗第十二子至德二載封興王上元元年六月薨伾皇后張氏所生上元鍾愛后屢危太子欲以興王爲儲貳會薨而止七月丁亥詔曰厚禮所以飾終易名所以表行況情鍾天屬寵及襲封載疇加等之美式備元儲之贈永懷軫念有惻彝章第十二子故興王伾毓慶瑋源分華若木天資純孝神假聰明河間聚書幼聞樂善之旨延陵聽樂早得知音之妙頃以暫嬰沉痾殆積旬時而資散益彰穎悟逾爽愛親之戀言不間於斯須告訣之辭事先符於夢寐顧惟至性實切深哀將祔土析珪載崇藩翰聞詩對易爰就琢磨方冀成立豈期天喪瑤英始茂遽摧於當春隙駟俄遷忽沉於厚夜興言痛悼閔惜良深宜責寵於青宮俾哀榮於玄窆可贈太子諡曰恭懿應緣喪葬所司準式仍令京兆尹劉晏充監護使詔宰臣李揆持節冊命十一月葬于高陽原其哀冊曰維上元元年太歲庚子六月己未朔二十六日甲申皇第十二子持節鳳翔等四州節度觀察大使興王伾薨于中京內邸殯于寢之西階粵八月丁亥冊贈皇太子廟號恭懿冬十一月庚寅詔葬于長安之高陽原禮也薨隧開封龍輶進轍陳祖載而就位儼塗芻以成列皇帝哀玉林之闕景憫瑋之惟霜瞻龍綽而增思懷鴈池而永傷考諡惟古喪崇有式爰

詔史司恭宣懿德其辭曰惟天祚唐累葉重光中興宸景再紐乾綱本枝建國磐石疏疆克開龍膺寶曰  
賢王驪源孕彩日幹騰芳深仁廣孝蘊藝含章秀發童年惠彰齒齒蹈禮知方承尊叶旨對日流辯占鳳  
擅美魯衛後塵間平絕軌胡孽初構王師未班爰從襁褓載歷險艱愛備中掖名崇懿藩居常稟訓動不  
違顏禮及佩觿朝加分器胙土延渥登壇受帥玉質金聲文經武緯樂善爲寶崇儒是貴溶哲外朗溫文  
內深閱書成誦觀樂表音五經在口六律諧心才優藝洽絕古超今蛇豕猶梗實區未久滌慮祈真焚香  
演偈食去葷血心依定惠庶福邦家俾清兇穢霧露嬰疾聰明害神沉痾始邁彌曠盈旬止慮無擾發言  
有倫在膏方亟問膳逾勤雲物告徵星辰變象楚藥無救秦醫莫仗靈儀實而上賓徽音邈其長往違舊  
邸於青社卽幽陵於黃壤嗚呼哀哉魂氣奪兮去何之精靈存兮孝有思念君親之永隔託夢寐而來辭  
延桂宮而震悼貫椒臺而纏悲旌遺芳於碣館賁新命於儲闈嗚呼哀哉先遠戒候占龜獻吉指鶉野而  
西臨背鳳城而右出天慘慘而苦霧山蒼蒼而瞻日望馳道而長辭赴幽塗而永畢嗚呼哀哉生爲寵王  
兮宸愛所鍾歿追上嗣兮朝典斯崇升玉笙於洞府閤銀絜於泉宮金石誰固人生有終簡冊攸記兮德  
音無窮敢直詞於篆美庶永代而成風嗚呼哀哉召薨時年八歲旣薨之夕肅宗張后俱夢召有如平昔  
拜辭流涕而去帝方寢疾追念過深故特以儲闈之贈寵之上疾累月方平

定王侗肅宗第十三子亦張后所生侗之母弟至德二載封定王寶應初薨時年甚幼

宋王僖肅宗第十四子初封淮陽王早夭追封宋王

代宗皇帝二十子睿眞皇后沈氏生德宗皇帝崔妃生昭靖太子獨孤皇后生韓王迥餘十七王舊史不載母氏所出

昭靖太子邈代宗第二子寶曆元年封鄭王大厯初代皇太子爲天下兵馬元帥王好讀書以儒行聞大厯九年薨廢朝三日由是罷元帥之職上惜其才早夭冊贈昭靖太子葬於萬年縣界

均王遐代宗第三子早夭貞元八年追封

睦王述代宗第四子大厯九年冬田承嗣謀亂河朔時鄭王居長典兵師不幸薨落諸王皆幼多未封建大臣奏議請封親王分領戎師以威天下十年二月詔曰虞夏之制諸子疏封漢魏以還十連授律是用錫珪班瑞盤石開疆信通邑之紀綱爲中都之屏翰然則旌鉞之寄推擇攸難因親之任各膺其命第四子述第五子逾第六子連第七子迥第八子邁第十三子造第十四子邈第十五子運第十六子遇第十七子遙第十八子通第十九子達第二十子逸等並敏茂純懿稟於衷誠溫良孝恭形於進對動皆合議居必有常可以理衆靖人撫封宣化而總列城之賦繡分閭之謀克勸公家允輔王室今則均茅社之寵